

Tema: Behou eenheid en gebruik verskeidenheid om God se gemeente te bou.

Ontmoetingsdiens

Intreelied: Sb 15-1: 1 (almal), 2 (brs), 3(srs) , 4 (almal)

Votum

Seëngroet

Loflied Ps 147-1: 1, 2, 5

Geloofsbelijdenis Sing Sb 12-2: 5

Verootmoedigingsdiens

Wet: fokus op 4 de gebod en Skrifgedeeltes oor eenheid en vrede

Lees Gal. 5: 13 - 16 en Kol. 3: 12 – 15

Sing Ps 130-2: 1, 2

Gebed.

Woorddiens

Skriflesing Efesiërs 4: 1 - 16

Teks: Efesiërs 4: 1 - 3, 7 en 16

Woordverkondiging

Sakramentbediening

Nagmaalsformulier (Calvyn)

Sing nuwe Sb “Krag in brood en wyn” : 1, 2

Nagmaalbediening

Sing aan tafel Ps 116-1: 7, 10

Lofverheffing en gebed

Sing na die tafel Sb 7-2: 1, 2

Antwoorddiens

Liefdegawes

Sing Ps 133-2: 1, 2

Seën

Amen Sb 13-2

Geliefde brs en srs en kinders

Die kerk van die Here is ‘n unieke en eintlike wêreldvreemde skepping. Die lewe in die kerk soos wat ons dit ook in ons gemeente ervaar, is totaal anders as die lewe daar buite in die wêreld. Die kragte wat die lewe in die kerk beheer is totaal anders as die kragte wat gewoon in die wêreld tussen mense aan die werk is. Die kerk is immers God se unieke versameling van mense wat Hy vir Hom in die wêreld bymekaar maak om nou reeds hier op hierdie aarde iets van die lewe op die nuwe hemel en aarde in die ewige lewe duidelik te maak.

Iets van hierdie anderse lewe in die kerk het ons beleef met ons laaste fokusweek se tema naamlik: onderlinge verbondenheid of onderlinge meelewing. Die woord “verbondenheid” duï op die diep en sterk band of eenheid wat God tussen mense in die gemeente lê. **Die basis** waarop hierdie mense saamkom naamlik dat God hulle kies en saamvoeg, **die kragte** wat tussen hulle werk naamlik liefde en die **wyse waarop hulle met mekaar omgaan** moet dus dramaties verskil van ongelowiges of ander mense wat nie in die gemeente is nie.

Die wonder van hierdie “onderlinge verbondenheid” het veral die lidmate beleef wat in die afgelope 5 weke saam in kleingroepe bymekaar kon kom. Dit was ‘n heerlike belewenis van eenheid en onderlinge gemeenskap.

Wanneer Paulus in ons teksverse vir die gemeente sê: **ek vermaan julle om te lewe waardig die roeping waarmee julle geroep is, dan bedoel Paulus juis dat die nuwe lewe in Christus jou lewe verander en dat daardie nuwe lewenswyse juis binne die gemeente duidelik moet word.** God het die gemeente uniek en anders gemaak en die lidmate moet hulle lewe volgens die eise van hierdie nuwe lewe inrig sodat hulle lewe in die gemeente in ooreenstemming kan wees met hierdie unieke bestaanswyse.

Brs en srs, ons kan die Here se boodskap vir ons vanmore dan so saamvat: **Behou eenheid en gebruik verskeidenheid om Potchefstroom-Oos as God se gemeente op te bou.** Die Here maak ‘n dringende oproep om die eenheid wat God in die gemeente gegee het, te bewaar en die verskeidenheid van gawes wat God gegee het, te gebruik Potchefstroom-Oos op te bou as kerk van die Here.

Die eerste unieke eienskap van ons gemeente is dat die Here ‘n onbreekbare band van eenheid tussen ons almal gelê het. Paulus beskryf hierdie eenheid in verse 4 – 6 as **‘n eenheid wat deur die Drie-enige God bewerk en gebou word.** Die Heilige Gees bou een kerk gerig op een doelwit, die Here Jesus Christus gee een geloof aan almal en God die Vader wat oor almal heers, deur almal werk en in almal woon.

Brs en srs, die Here het ons onlosmaaklik aan mekaar vasgemaak in die gemeente. Elkeen van ons staan in hierdie onlosmaaklike band met die ander een verbind en ons word opgeroep om hierdie band van eenheid te handhaaf. Ons kan ons nie van mekaar losmaak nie – dit is sonde! Ek kan nie sê “ ek wil niiks met hierdie of daardie lidmaat of ampsdraer te doen nie”. Ek wil niiks van hom of haar weet nie en wil ook nie by hom of

haar betrokke wees nie! **Jy kan nie so sê nie want God het jou en daardie persoon aan mekaar vasgebind, ons vorm saam 'n eenheid!**

Die Griekse woord wat hier vir “handhaaf” gebruik word, beteken ook “om iets op te pas of te bewaar” soos 'n mens 'n kosbare skat sou oppas. Die woord word ook gebruik om aan te dui “om iets te preserveer” met ander woorde om dit te laat hou! **Paulus vermaan die lidmate van Efese ernstig om hierdie band van eenheid te beskerm, op te pas en te laat hou!** Hierdie eenheid is 'n kosbare skat, dit is 'n unieke eienskap van die kerk van die Here en dit moet opgepas word.

Hoekom? Want God ken ons menslike geaardheid. Ons lees en Efesiërs 2 dat die gemeente in Efese hoofsaaklik uit heidene bestaan het, meestal Grieke, wat tot die Christelike geloof gekom het. Daar was egter ook **Christene wat vroeër Jode of Hebreërs** was, in die gemeente. **En die Jode en die Grieke kon mekaar nie vat nie!** Die **Christene wat uit die Joodse geloof** gekom het, was gewoond daaraan om aan enige ander mens wat nie 'n Jood was nie en nie in God geglo het nie, as minderwaardig te beskou. Hulle het sulke mense “honde” genoem.

Die Grieke het weer 'n weersin gehad in die Jode se hooghartigheid en hulle Joodse godsdiensige gebruikte. **En nou is hulle saam in een gemeente.** Hulle kulture verskil, hulle taal verskil, hulle voorkeure en afkeure verskil en nou moet hulle saam aanbid! Hf 2 gaan dan huis daaroor dat Christus die skeiding tussen Jode en heidene in die kerk afgebreek het en dat hulle nou een gemeente in Christus vorm.

Maar dit het nie beteken dat daar nie probleme was nie! Probleme vanweë sondige menslike selfsugtige voorkeure en beskouinge. 'n Mens kan jou die probleme indink! Verskillende tale en rasse in een gemeente. Totaal uiteenlopende agtergronde, behoeftes en voorkeure van aanbidding en gemeentelike uitlewing! En soos mense is, was daar sekerlik verskil van opinies oor die gemeente.

Maar nou roep die Here hulle ernstig tot orde en sê: Ek het julle as een gemeente saamgevoeg met 'n band van eenheid en julle moet hierdie eenheid met heilige erns bewaar!

Geliefde gemeente, net so roep die Here ons vanmore ook as gemeente op om hierdie eenheid wat God in Potchefstroom-Oos gelê het te bewaar. Hier is ook onder ons verskille. Hier is verskillende sieninge oor hoe die bediening in die gemeente moet plaasvind. Hier is verskillende sieninge van wat 'n erediens is en hoe dit geleei moet word. Hier is verskillende behoeftes aan geestelike uitlewing en geestelike groei. Hier is lidmate wat nie van mekaar hou nie en mekaar nie sal groet nie!

En nou is hier ook vir die eerste keer twee predikante in die gemeente wat verskillende gawes en verskillende styl in bediening het. Mense sien hierdie verskille raak en lidmate begin voorkeure uitspreek van wie hulle mag of moet bedien en hoe hierdie bedieninge gedoen moet word. In die afgelope tyd is daar heftige en skerp kritiek

uitgespreek, soms van persoonlike aard. Lidmate bespreek die predikante en die bedieninge met mekaar en afbrekende opmerkings word gemaak. Dit is nou soos Paulus in Korintiërs sê dat sommige vir Paulus is en sommige vir Apollos. Wie kom erediens toe wanneer wie preek?

Brs en srs, dit kan tog nie! Natuurlik is niemand bo kritiek verhewe nie en elke lidmaat en ampsdraer het verseker die reg om sy of haar voorkeure en behoeftes uit te spreek, maar dan moet dit in ‘n gees van liefde en in ‘n soeke na eenheid gebeur en nie om die gemeente uit mekaar te skeur of te verdeel nie.

Want, brs en srs, eenheid beteken tog nie eendersheid nie. Ons is en kan nie almal dieselfde wees nie! **Dit leer die Here ons vanaf vers 7 – 16. God gee huis mense met verskillende gawes aan die gemeente sodat al die verskillende gawes kan saamwerk tot opbou van die gemeente.** Vers 16 verduidelik dit mooi met die metafoor van ‘n liggaam. Christus is die hoof van ons gemeente en elke lidmaat vorm ‘n verskillende en unieke ledemaat daarvan. Al die verskillende ledemate met hulle verskillende gawes moet by mekaar pas en met mekaar saamwerk om die liggaam van die Here op te bou.

In een huis kry mens kinders met totaal uiteenlopende geaardhede en tog is dit een huis. In elke huis kom daar van tyd tot spanning, so ook nou in ons huisgesin, omdat mense verskillende eise stel.

Ons kan nie almal op dieselfde wyse ons geloof beleef nie. Ons het verskillende behoeftes, verskillende bedieninge van die Here ontvang, verskillende persoonlikhede en verskillende behoeftes. **Maar al hierdie verskillende aspekte moet saamgevoeg word in ‘n eenheid waarin ons almal saamwerk om hierdie gemeente –** wat Christus se gemeente is – op te bou en te laat groei.

Brs en srs, die Here sê vanmore vir ons dat ons die eenheid moet vashou en die verskeidenheid moet gebruik om hierdie gemeente van die Here op te bou!

Hoe sal ons dit dan doen! Hoe bewaar ons die eenheid van ons gemeente en hoe gebruik ons die verskeidenheid in die opbou van ons gemeente? **Deur op ‘n drievalige wyse op Christus gefokus te wees!** Die Here gee ons 3 maniere waarop ons lewenswandel in die gemeente in ooreenstemming kan wees met God se unieke skepping van die kerk:

1. Elkeen van ons moet met ‘n nederige gesindheid optree. Hierdie eerste riglyn wys op ons verhouding met God! **Dit gaan nie om my nie! Dit gaan om Christus en sy kerk!** **Wanneer ek nederig optree dan plaas ek die fokus op Christus.** Wanneer ek dus kritiek en my behoeftes uitspreek in die gemeente, wanneer ek met ander omgaan is dit met ‘n gesindheid van nederigheid. Dit is nie my kerk nie, dit is God se kerk. Op dieselfde manier moet ampsdraers die kritiek wat teenoor hulle uitgespreek word ontvang! Dit gaan nie oor my nie, dit gaan oor Christus en sy kerk en hierdie gemeente opbou.

Geliefde brs en srs, kom elkeen van ons koester die eenheid van ons gemeente deur innerlik nederig voor die Here met mekaar om te gaan.

2. Die tweede riglyn wat die Here ons gee is “sagmoedigheid”. Die nuwe vertaling het dit ongelukkig swak met “vriendelikheid” vertaal. **Sagmoedigheid duï op die wyse waarop ek uiterlik teenoor ander optree.** Sagmoedige mense wil nie seermaak en afbreek met kritiek nie, maar wil leiding gee en opbou. Sagmoedige mense stel nie eise ten koste van ander mense se behoeftes nie.

Dis opvallend dat Here sê: wees ALTYD, in alle omstandighede sagmoedig. Daar is niks wat in die gemeente gebeur waar jy nie sagmoedig moet optree nie! Al voel jy hoe gebelyg en verontreg! Jy bly sagmoedig! Wanneer sagmoedige mense gekritiseer word, word hulle nie kwaad en wil wraak neem nie! Nee, hulle luister en leer. **Dan tree jy waardig God se kerk op!**

Geliefdes, mag die Here vir elkeen van ons ‘n sagmoedige hart en gesindheid gee!

3. Die derde riglyn wat die Here gee waarmee ons mekaar gaan vashou en mekaar opbou is geduldige liefde! Om geduldig met mekaar te wees! Om ook mense met wie jy nie saamstem nie, wat dinge doen waarvan jy nie hou nie, met liefde te verdra! Natuurlik mag ons nie sonde, dwaalleer of valsheid verdra nie, want die Here sê ook duidelik in vers 15 dat ons die waarheid moet vashou! Maar dan moet ons ook leer om te onderskei wat is werklik waarheid en was is werklik menslike voorkeure en eise.

Brs en srs, kom ons wees geduldig met mekaar en wees lief vir mekaar al verskil ons van mekaar!

Geliefde gemeente kom ons doen hierdie 3 dinge met ons oog op Jesus Christus gevvestig! God sê daar is ‘n band van vrede in die gemeente en dit is Jesus Christus, ons Here! Hy is die band van vrede wat ons styf aan mekaar vasbind! **Hy het aan die kruis gesterf om vir ons sonde te betaal en so vrede met God te kan hê.** Dit is tog immers die rede waarom ek en jy deel van die gemeente! **Christus het ons met God versoen.**

Maar Christus het ons ook met mekaar versoen. By Hom leer ons ware liefde en by Hom leer ons om mekaar te aanvaar en mekaar te vergewe soos God ons elkeen aanvaar het en ons vergewe het. Wanneer elke lidmaat en ampsdraer op Christus fokus as die Hoof van die kerk, dan kan ons by mekaar verby kyk, mekaar se hande vat om ons Here eensgesind te dien, elkeen met sy of haar unieke gawe.

Geliefdes, die Nagmaal wat ons vandag vier is die teken of simbool van vrede wat Christus vir ons bewerk het. Vrede met God en ook vrede met mekaar. **Hier heers ‘n wonderlike band van eenheid wat die Heilige Gees self in Potchefstroom-Oos bewerk het.** Hier is wonderlike verskillende gawes wat dieselfde Heilige Gees aan ons gemeente gegee het! Ons kan die Here vandag maar net daarvoor loof en prys!

En daarom gaan ons nie toelaat dat hierdie eenheid verbreek word nie! Ek is nie bang nie, ons gaan dit saam deurwerk en ons gaan almal groei in die proses. Ons gaan dit bou deur die verskeidenheid saam te bind en ons Here se gemeente te bou.

Kom ons jaag dan hierdie vrede na met nederigheid, sagmoedigheid en geduldige liefde!
**Kom ons vier nou met vreugde die Nagmaal omdat Hy ons saamgebring het,
saamgebond het en aan mekaar gegee het!**

Gebruik die wyn en brood en dink aan die vrede en eenheid tussen jou en God en met elke lidmaat in die gemeente! Dink ook aan die verskeidenheid wat die Here hier gee en hoe ons dit kan gebruik! Ook hoe God jou met jou gawe wil gebruik!

Br en sr, mag daar vanmore vir jou, vir elke lidmaat, vir elke ampsdraer, vir elke predikant vrede wees in ons Here Jesus Christus.

Amen